



KOMUNIKADO PA PRENSA

Fecha

29/9/2014

Manager di Komunikashon

Jhanirha Da Costa Gomez- Anita

Adrès elektróniko

jhanirha.anita@gobiernu.cw

60 AÑA PASA KU ORKAN HAZEL A KOUSA HOPI DAÑO MATERIAL NA KÒRSOU

Willemstad - Servisio Meteorológiko Kòrsou ta informá komunidad ku mayan, 7 di òktober ta kumpli sesenta aña ku orkan *Hazel* a pasa djis nort di Boneiru, Kòrsou i Aruba. E orkan aki a kousa bastante daño material, sigur na Aruba i Kòrsou.

Ta importante pa wak bek riba e daño ku Orkan Hazel a hasi na Kòrsou pa asina nos ta konsiente i keda alerta di e peligernan di un orkan, speshalmente den e temporada di orkan ku Kòrsou ta den aktualmente.

Segun relatonan di e Büró di Wer Merikano (U.S. Weather Bureau), un ola tropikal di dia 5 di òktober 1954, den bisindario di Grenada, a desaroyá bira Orkan Hazel. E tempunan ei no tabatin satelit pa wer ainda. Tabata opservá wer for di riba tera òf laman, i tambe for di e avion di orkan ('hurricane hunter').

Na momentu ku *Hazel* a pasa djis nort di Grenada dia 5 di òktober, e bientunan mas fuerte den e sistema aki tabata mas o ménos 160 kilometer pa ora. E orkan di kategoria dos, riba eskala di *Saffir-Simpson*, tabata move na momentu ei den direkshon wèst nortwèst.

Durante di mainta di dia 6 di òktober, Meteo a emití atvertensha di orkan na Islanan ABC mirando ku *Hazel* tabata forma un menasa serio pa e islanan. A kita entre otro Koningin Emmabrug for di su posishon i a hib'é Parera komo medida di prekoushon. Vários instansha manera polis, brantwer i DOW a drenta den estado di alerta.

Un dia despues, djaweps dia 7 di òktober, Hazel a yega na su punto mas serka esta 90 kilometer nort di islanan ABC i a kousa hopi áwaseru riba vários parti di Aruba, Boneiru i Kòrsou. E kantidatnan di áwaseru ku a midi na Kòrsou e dia ei, tabata na Santa Rosa: 173 mm, Scherpenheuvel: 157 mm, Sint Thomacollege: 127 mm, Klein Kwartier: 117 mm, Fort Nassau: 98.5 mm, Blauwbaai: 83 mm, Kleine Berg: 69 mm, Westpunt: 66 mm, i Sint Willibrordus: 55 mm.

Direkshon di bientu riba e dia ei a kambia gradualmente bira nort pa nortwèst, sùit pa sùitost. Na e momentunan ei, e bientunan mas fuerte rondó di sentro di e orkan tabata alkansá 185 kilometer pa ora. Esaki a bira pues un orkan kategoria tres. Dor di esei, laman a bira hopi brutu na nos kostanan sùit i esei a hustifiká e kitamentu di Emmabrùg.

E daño material mas grandi, kousá dor di Orkan Hazel, tabata sin embargo pa motibu di e kantidat grandi di áwaseru ku a kai den tres pa kuater ora na Kòrsou.



KOMUNIKADO PA PRENSA

Fecha

29/9/2014

Manager di Komunikashon

Jhanirha Da Costa Gomez- Anita

Adrès elektróniko

jhanirha.anita@gobiernu.cw


Vários dam a kibra dor di esaki i tabatin diferente kas ku a yena ku awa. E tempu ei, awa no por a kore bai den hopi roi, pa motibu di shushi i mata ku tabatin den nan. E daño material na Kòrsou a tabata mas o ménos 630.000 florin.

Na Aruba a kai mas tantu áwaseru ainda ku na Kòrsou, ya ku *Hazel* a kuminsá move ku ménos velocidat i a kambia su rumbo tambe, moviendo den direkshon nort. Dor di esei, dia 9 i 10 di òktober tambe a kai yobida fuerte na Aruba atrobe relashoná ku e orkan aki. E daño mas grandi ku áwaseru di e orkan a kousa na Aruba tabata na San Nicolas i Sabaneta. E daño material na Aruba tabata mas òf ménos ku 830.000 florin.

E daño ku Orkan *Hazel* a kousa na Boneiru tabata limitá i e kantidat di áwaseru einan no tabata masha grandi.

Komo medida pa kontrolá konsekuensianan di orkan den futuro, Gezaghebber Michael Gorsira di Kòrsou, e tempu ei a saka un "Algemene Order" riba 11 di yanüari 1955. Den esaki, el a anunsiá vários plan di akshon pa e diferente servisionan di gobièrnu por tuma medida ora ku tin menasa di orkan. Ademas Servisio Meteorológiko di Antia Hulandes na 1956 a optené un stashonnan di radio, komo parti di un "early warning system di Merka". Esaki ta parti di un kooperashon entre di Reino Hulandes i Merka ku te ainda ta vigente.

Manera e mapa athuntu ta mustra, despues ku Orkan *Hazel* a afektá Islanan ABC, el a move den direkshon nort i kousa hopi daño i morto na Haiti i despues tambe na estadonan South i North Carolina na Merka.



Trayekto di Orkan Hazel entre di 5 i 14 di òktober 1954